


144



種樹書卷之上

漢 郭 橐 駝 著
明 周 履 靖 校

正月

九焦在辰 天火在子 地火在巳

元旦鷄鳴以火把照桑果無蟲

辰日將斧斑駁斫樹則結子不落

此月栽樹為上時

以輓石放於樹岐枝多結實

乾隆三十四年...

凡栽果上半月栽者多子南風火日不可栽
下茄瓜天羅子蕙苡諸般花子

籖楊柳木香長春佛見笑薔薇石榴梔子

種松桑榆柳棗葱葵韭麻椒牛蒡子竹宜初二

日

雜樹木宜上旬

木綿花苦蕒山藥冬瓜宜三十日

接諸般花果樹

移諸般花果樹已上凡種時並忌南風火

壟瓜地

移桑樹高樹白桑宜山岡地上墻邊籬畔種之

五月收桑椹以水淘取子畧晒成畦種之至

冬間燒去稍明年分開再種一年後可移若

是矮短青桑宜水鄉田土水畔種之正二月

用木鈎攀枝地上以土壓之明年正月便可

截斷移種每年兩次用糞或蠶沙添肥土澆

壅常鋤去草根動浮根樹下宜種菜蔬依時

修治則葉茂

修桑樹削去枯枝去樹低下小者死枝條開根
用糞土泥培壅與十二月同此月上旬不修
理則葉生遲而薄

種葦取爛穀木截斷埋於陰地用草蓋常以米
泔沃之則生宜用丁開日采木

鋤耘麥過此月則失時

秧芋用已熟過糞灰密排候生芽

栽葱韭薤去鬚曬乾疎行密排用鷄糞蓋
修果木去低小亂枝條勿令分力

二月

九焦在丑 天火在卯 地火在午

此月雨中埋諸般樹條則活

下麻子山藥

籖芙蓉石榴木槿

種槐茶薤木瓜桐樹決明百合胡麻黃精竹茄

瓜莧枸杞萱草蒼朮鳳仙芭蕉地栗蒿苳茨

菰雜菜芋宜雨後

葫蘆黃瓜藏瓜茄冬瓜宜清明日中每日以少

糞水澆

分菊宜清明

夏蘿蔔菘菜烏頭豌豆甘蔗菜萹宜社前

玉簪石菊山丹

接桃李梅棗柑橘桑柿

移諸般花果已上忌南風火日

萵苣苦蕒生菜

舒葡萄上架

解樹上裹縛

種椒候椒十分熟揀大者陰乾收子不要手捻

包裹地內來年此月初種或當時種濕潤肥

地內以破薦蓋上用泥宜常潤候生出土去

薦做棚逐株分開次年移種用瓦屑麻餅糞

灰欹斜種之三年後換嫩條方結實蛇來吃

椒宜種香白芷或以髮纏樹根種生菜亦得

種茶宜斜坡陰地黍水處用糠與焦土種每一

圈用六七十粒土厚一寸出時不要耘草旱

用米泔澆常以尿糞水或蠶沙壅之三年後

可採藥

壓桑條濕土壓條爛燥土壓易生根
月內三卯有則宜豆無則宜早禾

三月

九焦在戌 天火在午 地火在未

種蒙豆早豆山藥黃瓜早芝蔴匏瓠葫蘆梔子

地黃藍青絲瓜

甜瓜用鹽水澆子以鹵水拌和澆壅

扁豆宜清明

芋宜近水

紫蘇在瓜畦上可遮日得兩利

黃獨葶薺木綿麻子菱

移椒茄秧芍藥百合剪金茭白枸杞苗

蒲宜上旬雨中

梔子帶花移則活梅雨中宜籤

接梅杏

下江豆穀雨前後種六月收子便種八月再生
又收一次

收薺菜花

月內三卯有則宜豆無則宜麥禾

四月

九焦在未 天火在酉 地火在申

此月伐木不蛀

下芝麻

種夏蘿蔔松菜椒松大豆紫蘇晚黃瓜葵蓮菜

豆白莧

枇杷忌糞

荷根宜立夏前三日

麻宜夏至前十日

籬梔子茶藤木香

收蘿蔔子蠶豆葱子

五月

九焦在卯 天火在子 地火在酉

下夏菘菜

種晚大豆苜蒲晚紅花香菜桃杏梅核

移竹宜十三日竹醉日

種樹書 卷之十一 六
斬桑採後卽斬不可過夏至節過則脂漿已上

根無力忌西南風

收菜子大蒜紅花槐花小麥木綿藍青蒼耳櫻
粟蘿蔔子

芋葉治刀傷

收蠶種揀簇上硬繭尖細緊小者是椎圓慢厚
大者是雌收同時出者卯時放對未時摘放
子如環如堆者不可留毋蛾在上覆子者三
五日則氣足方用桑皮穿掛涼處忌麻苧線

掛烟薰日炙之若收種不仔細徒費力養蠶
浸蠶種以蒲艾柳井水畧浸去屎收掛
月內三卯有則宜大小豆無則種早豆

六月

九焦在子 天火在卯 地火在戌

種小蒜冬葱胡蘿蔔

早蘿蔔宜初六日

晚越瓜收子便種宜糶

蘿蔔宜立夏日

油麻宜上旬

夏菘菜上旬種中旬食

赤豆蒙豆立秋前十日宜麻地上種太早不生

不甞則宜豆忌卯日

收椒紫蘇

斫苧

麻於節卽斫宜薄束小漚宜青生熟合宜帶骨

一斤可取皮四兩

澆甘蔗柑橙橘

鋤竹園地苧地

七月

九焦在酉 天火在午 地火在亥

種小蒜葱蒿菜蘿蔔赤豆薑薑蔓菁早菜喬麥胡

蘿蔔苘蒿

菠菜宜月末下旬

芥菜宜立秋前

收藏椒紫蘇瓜種芙蓉葉

八月

種樹書 卷之三
九焦在午 天火在酉 地火在子

種大蒜櫻粟寒豆生菜苦蕒苧麻諸般菜葱子

大麥牡丹芍藥韭子芥子麗春紅花

椒秋分前後數日

諸色菜子分作兩三次種與蘿蔔同

移早梅木樾橙橘枇杷木香牡丹

分牡丹芍藥根并諸色花窠

鋤竹園地

九月

九焦在寅 天火在子 地火在丑

種椒茱萸地黃蠶豆柿蒜芥菜藏菜矮黃

移山茶臘梅雜果木

收藏冬瓜子茄種梅子枸杞槐子菊花栗子芝

麻

十月

九焦在亥 天火在卯 地火在寅

種大小豆春菜生菜蘿蔔諸色菜

接花果

壓桑條

澆灌花木

收茶子山藥二桑葉芋冬瓜

十一月

九焦在申 天火在午 地火在卯

種小麥油菜萵苣桑蘿蔔種

移松栢檜

接木

夾籬

澆菜

伐竹木

盪芙蓉條

收藏

十二月

九焦在巳 天火在酉 地火在辰

種橘松花樹桑

麥宜臘日

柳不生栽毛蟲

種樹書
卷之五
條桑

壓果樹

添桑土

墩牡丹皮

浴蠶種臘八日以桑柴灰淋汁以蠶種浸一日
却以雪水浸掛收或掛桑木上從雨雪凍一
二宿收度幾耐養

種樹書卷之上終

種樹書卷之中

漢 郭 橐 駝 著

明 周 履 靖 校

豆麥

凡種五穀用成收滿平定日為佳小豆忌卯稻
麻忌辰禾忌丙黍忌丑秫忌寅未小麥忌戌大
麥忌子大豆忌申凡九穀不避忌日種之多傷
敗

種諸豆與油麻大麻等若不及時去草必為草

種樹書 卷之四
所蠹耗雖結食亦不多諺云麻耘地豆耘花麻
須初生時耘豆雖花開尚可耘
種菘豆地宜瘦

臘日種麥及豆來年必熟

麥苗盛時須使人縱牧其間蹂踐令稍實則其
收倍多

麥屬陽故宜乾原稻屬陰故宜水澤

小麥不過冬大麥不過年

麥最宜雪諺云冬無雪麥不結

種麥之法土欲細溝欲深爬欲輕撒欲勻
晒麥之法宜烈日中乘熱而收仍用水蓼剉碎
雜其間則免化蛾

桑

穀上接桑其葉肥大桑上接梨脆美而甘撒子
種桑不若壓條而分根莖

鷄脚桑葉花而薄得繭薄而絲少

白桑葉大如掌而厚得繭厚而堅絲每倍常

桑葉生黃衣而皺者號曰金桑非特蚕不食而

木亦將就槁矣

先樵而後葉者葉必少

浙間植桑斬其桑而植之謂之嫁桑却以螺殼覆其頂恐梅雨侵損其皮故也二年卽盛

常以三月三日雨十桑葉之貴賤諺曰雨打石頭偏桑葉三錢片或曰四日尤甚杭州人云三日尚可四日殺我言四日雨尤貴

養蠶法收取種繭必取居簇中者近上則絲薄近下則子不生

按五行書曰欲知蚕善惡常三月三日天陰而無日不雨蚕大善

蚕繭腰小者雄蛾大者雌蛾鷄鶩鴨卵圓者雄尖者雌

午日不得鋤桑園

有柘蚕食柘而早繭

葉濕者不可飼蚕雨中採至必拭令乾恐有傷

竹

冬至前後各半月不可種植蓋天地閉塞而成

冬種之必死

種時斬去稍仍爲架扶之使根不搖易活又法
三兩竿作一本移蓋其根自相持則尤易活也
或云不須斬稍只作兩重架爲妙

種竹處當積土令稍高於旁地二三尺則雨潦
時不侵損錢唐人謂之竹脚

竹有花輒槁死花結實如稗謂之竹米一竿如
此則久之滿林皆然其治法於初米時擇一竿
稍大者截去近根三尺許通其節以糞之則止

竹林中有樹切勿去之蓋竹爲樹枝所礙雖風
雪不復欹斜

篁竹根多穿害堦砌惟聚皂莢刺堆土中障之
根卽不過栽油麻其亦妙

凡種竹正月二日宜取西南根於東北角種之
其鞭自然行西南蓋竹性向西南行也諺云東
家種竹西家種地若得死猫埋其下其竹尤盛
竹有醉日卽五月十三日也齊民要術謂之竹
醉日岳州風土記謂之龍生日移竹栽宜用此

種竹書
日或陰雨土虛則鞭行明年笋莖交出
種竹以五月二十日爲上是日遇雨尤佳或曰
不必五月但每月二十日皆可又一說正月一
日二月二日三月三日皆可種無不活者每月
倣此

種竹若用鋤頭打實土則笋生遲

種竹不去篠則林外向陽者三二年間便有大
竹諺云栽竹無時雨過便移多留宿土記取南
枝如要不間年出笋用本命日謂正月一日二

月二日之類

種竹不拘四時凡遇雨皆可若遇火日及有西
風則不可移花木亦然移時須是大其根盤維
以草繩仍記向背爲佳

大率種竹須向北蓋根無不向南也仍須土鬆
淺種不用增土於窠株之上乃佳夢溪忘懷錄
之法尤妙

種竹須將竹毋斬去只留四五尺長仍斜植之
種竹須濶掘溝用籠糠和泥抱根然後用淨土

種竹書 卷之四 五
傳其上或鋪少大麥於其中令竹根着麥土以土蓋之其根易行

志林云竹有雌雄雌者多笋故種竹常擇雌者物不逃於陰陽可不信歟凡欲識雌雄當自根上第一枝觀之雙枝者爲雌卽出笋若獨枝者是雄竹耳

種竹法擇大竹就根上去上三四寸許截斷之去其上不用只以竹根截處打通節實以硫黃末顛倒種之第一年生小竹隨卽去之次年亦

去之至第三年生竹其大如所種者

種竹用舊茅茨夾土則竹根尋地脉而生

竹有六十年數便生花

竹以三伏內及臘月斫者不蛀

竹留三去四蓋三年者留四年者伐去

月菴種竹法先鋤其地深三尺濶一尺五寸將馬糞須乾草糞和細泥并水填令一尺高令人於其上踏熟或無馬糞以籠糠代之夏月令稀冬月令稠然後種竹須三四莖作一叢者淺栽

爲佳上多用河泥蓋之斫去竹稍裝架地廣宜種篁竹亭檻間宜種筋竹至次年八月後方可去篠竹

禁中種竹一二年間無不茂盛園子云初無他術只有八字踈種密種淺種深種踈種謂三四尺地方種一窠欲其土虛行鞭密種謂種得雖踈每窠却種四五竿欲其根密淺種謂種時入土不甚深深種謂種得雖淺却用河泥壅之宋子京種竹詩云除地墻陰植翠筠踈枝茂葉

與時新賴逢醉日元無損政自得全於酒人種植家云五月十三號竹醉日是日栽之無不茂盛又云用辰日良山谷所謂根須辰日斲筍看上番成又云宜用臘日杜陵謂東林竹影薄臘月更宜栽然臘月之說大繆見石林錄話

竹之滋澤春發於枝葉夏藏於榦冬歸於根如冬伐竹經日一裂自首至尾不得全盛夏伐之最佳但於林有損未盛夏伐竹則根色皆紅而鞭皆爛然要好竹非盛夏伐之不可七八月亦

尚可自此滋澤而不中用矣如要竹不蛀取五
月以前仍用血忌日但此月和前竹不生皆根
爛

秋分後春分前皆可移竹木

竹與菊根皆向上長添泥覆之爲佳

七月間移竹無不活者

木

凡木皆有雌雄者多不實可鑿木作方寸穴取
雌木填之乃實

凡木擣麻油查雜糞灰壅之則枝葉茂

冬青樹凋瘁以猪糞壅之則茂一說以猪溺灌
之

凡木蚤晚以水沃其上以唧筒唧水其上

移樹木用穀調泥漿於根下日沃水無不活者
插杉枝用驚蟄前後五日斬新枝鉏開坑入枝
下泥杵緊視天陰則插了遇雨十分生無雨卽
有分數

草木被羊食者不長

栽松時去松中大根惟留四旁鬚根則無不偃
蓋

一年之計種之以竹十年之計種之以木

凡移樹不要傷動根鬚須潤掘塚不可去土恐
傷根諺云移樹無時莫教樹知

松必用春後社前帶土栽培百株百活舍此時
決無生理也

春分後勿種松秋分後方可種不獨松爲然

種松法大槩與竹同只要根實不令搖動自然

活

令移樹者以小牌記前枝不若先鑿掘窟沃水
攪泥方栽築令實不可踏仍多以木扶之恐風
動其顛則根搖雖尺許之木亦不活根不搖雖
丈餘可活更芟其上無使枝葉繁則不受風
種一切樹大枝亦南栽亦向南

凡樹一移當三年

樹得桂而枯然未可一槩論若以桂爲丁在下
釘則順插爲柳倒插爲楊

木自南而北多苦寒而不生只於臘月去根旁
土取麥穰厚覆之然火成灰深培如故則不過
一二年皆結實若歲用此法則南北不殊猶人
炷艾耳

種柳無載毛蟲於根下先種大蒜一枚卽不生
蟲又云微刮去根下皮以甘草末擦之亦佳

種水楊須先用木椿釘穴方入楊木度不損皮
易長臘月二十四日種楊樹不生掣子

凡斫松木五更初斫倒便削去皮則無白蟻又
須擇血忌日斫則白蟻不食七月辰日最良若
已爲白蟻所食於血忌日以斧敲之云今日血
忌則白蟻自出黃梔子候其大時摘青者晒收
至黃熟則消化爲水

元日天未明將火把於園中百樹上從頭用火
燎過可免百蟲食葉之患

貧婆樹冬花夏子

種桑取樵子水淘取子暴乾熟耕地畦種

種柳取青嫩枝如臂長六七尺燒下二三寸埋

種樹書
卷之四
二尺以上

種青桐九月收子二月三月作畦種之治畦下
水

種樹書卷之中 終

種樹書卷之下

漢 郭 橐 駝 著
明 周 履 靖 校

花

花木旺於春竹旺於秋

凡接牡丹須令人看視之如一接便活者逐歲
有花若初接不活削去再接只當年有花

牡丹花上穴如針孔乃蟲所藏處花工謂之氣
瘡以大針點硫黃末針之蟲乃死或云以百部

塞之

牡丹千葉者蜀人號爲京花謂洛陽種也單葉者只恐爲川花又曰山花又曰山丹

菜園中間種牡丹芍藥最茂

牡丹芍藥不可置木斛中不耐久仍須要避風處

海棠花欲鮮而盛冬至日早以糖水澆根下

立春如是子日於茄根上接牡丹花不出一月卽爛熳

初春掘藕根取節頭着泥中種之當年着花

以蓮葯投甃甕中經年移種發碧花

種蓮鬚先以羊糞壤地於立夏前三兩日種當年便着花又法用五月二十日移深種蓮柄長者以竹枝子扶之無有不活

種藕以酒糟塗之則盛

月桂花葉常苦蟲食以魚腥水澆之乃止

李贊皇花木記以海爲名者悉從海外來如海棠之類是也

瑞香花惡濕日不得頻沃以水宜用小便可殺
蚯蚓或從花脚澆之則葉綠又用梳頭垢膩根
上有日色卽覆之

鷄糞壅茉莉則盛壅百合則甚孳生

用燂猪湯澆茉莉素馨花則肥

催花法用馬糞浸水前一日澆之三四日方開

次日盡開

木犀接石榴開花必紅

花木接者移種須令接頭在土外

灌溉花木各自不同木犀當用猪糞瑞香當用

燂猪湯葡萄當用米泔水和黑豆皮花木有不

宜糞穢者甚多尤宜審問用之非其宜則立稿

園中四旁宜種決明草蛇不敢入

凡接花樹雖已接活內有脂力未全包生接頭

處切愛護如梅雨侵其皮必不活

澤洗布衣灰汁澆瑞香能去蚯蚓且肥花蓋瑞

香根甜得灰水則蚯蚓不食而衣服垢膩又自

肥也

芙蓉隔夜以靚水調紙蘸花蕊上以紙裹來日
開成

碧色花五色皆可以染

黃白二菊各披去一邊皮用麻皮扎合其開花
半黃半白

棘能辟霜花果以棘圍之卽茂

櫻粟九月九日及中秋夜種之花必大子必滿
凡種花藥須冬至後立春前作直枝有鶴膝如
大母指者長二尺許劄于芋魁中掘令寬調泥

漿細切生葱一升攪於泥中將芋魁置泥中以
細土覆之勿令實當年有花次年實

牡丹看蓋如彈子大時試捻之十朵之中必有
三兩朵不實者去之則不奪其他花力

凡種好花木其旁須種葱薤之類庶避麝香觸
也

種花藥處栽數株蒜遇麝香則不損

種蕙蘭忌用水洒

種蓮以麥門冬子夾種茂盛

凡種花欲得花多須用肥土秋冬間壅根春來著花自然盛以猪糞和土令發熱過爲肥土木犀葉有齒如鋸其紋亦粗澁者乃香有一等葉光澤者殊無香也又有一等花極白者亦無香蘭亦如之

冬間花瓶多凍破以爐灰置瓶底下則不凍或用硫黃置瓶內亦得

芍藥牡丹摘下燒其柄置瓶中後入水其柄以蠟封之尤妙

苦楝樹上接梅花則花如墨梅

海棠候花謝結子剪去來年花盛而無葉

凡花木有直根一條謂之命根起小栽時便盤了或以磚瓦承之則他日易移

凡花皆宜春種唯牡丹宜秋社前後接種

種水仙詩訣云六月不在土七月不在房栽東籬下寒花朵朵香

果

栗採實時要得披殘其枝明年益茂

和樹書 卷之五
桃樹接李枝則紅而甘

柿樹接桃枝則成金桃

李樹接桃枝則生桃李

桃實自乾不落者名桃臬

南方柑橘雖多然亦畏霜不甚收惟洞庭霜雖多無所損詢彼云洞庭四面皆水水氣上騰能閤霜所以洞庭相橘最佳歲收不耗正爲此爾以死鼠浸溺缸內候鼠浮取埋橘樹根下次年必盛涅槃經云如橘得鼠其果子多

柑樹爲蟲所食取蟻窩於其上則蟲自去

應點桃李銀杏栽蒂子向上箇箇生向下者少

桑上接楊梅則不酸

桑上接梨則脆而甘

葡萄欲其肉實當栽於棗樹之側於春鑽棗樹上作一竅子引葡萄枝入竅中透出至二三年

其枝旣長大塞滿樹竅便可斫去葡萄根令托

棗根以生便得肉實如棗北地皆如此種

銀杏樹有雌雄雄者有三稜雌者有二稜合二

者種之或在池邊能結子而茂蓋臨池照影亦生也

果樹有蠹蟲者以芫花納孔中卽除或云納百部葉

鑿果樹納少鍾乳末則子多且美又樹老以鍾乳末和泥於根上揭去皮抹之樹復茂

凡接矮果及花用好黃泥晒乾篩過以小便浸之又晒乾篩過再浸之又晒浸凡十餘次以泥對樹枝用竹筒破兩片封裹之則根立生以年

斷其皮截根取栽之

果實異常者根下必有毒蛇切不可食

果木有蟲蠹處用杉木作小丁塞之其蟲立死生人髮掛樹上鳥不敢食其實

凡種樹宜望前在望後則少實

接樹須取向南隔年近下者接之則着子多

花果樹如曾經孝子及孕婦手折則數年不着花或不甚結實

果子先被人盜吃一枚飛禽便來吃

凡果木未全熟時摘若熟則抽過筋脉來歲必不盛

果實凡經數次接者核小但其不可種耳

河陰石榴名三十八者其中只有三十八子

橄欖將熟以竹釘之或納鹽於皮下其實盡落

荔枝結子時若日午有雨則盡落

甜瓜生者以鯨魚骨插頂上則蒂落而易熟

柿子接及三次則全無核

桃樹過春月以刀踈斫之則穰出而不蛀

桃實太繁則多墜以刀橫斫其榦數下乃止

社日令人舂桃樹下則結實牢凡果實不牢者

宜社日舂其根

三月上旬取果木斫取好直枝如大母指長五

寸納芋魁中種之或大蔓菁根亦可用勝種核

種核三四年乃如此大耳

桃子蛀者以煮豬頭汁冷澆之卽不蛀

桃者五行之精制百鬼謂之仙木

凡果實初熟用雙手摘則年年生

果木見麝香則蔦花不結子

種甘蔗必猪毛和土必長茂

梅樹接桃則脆桃樹接杏則大

桃熟時墻面暖處寬深爲坑收濕牛糞納坑中
好桃核子數箇尖頭向坑中糞土厚蓋一尺深
春芽生和土移種之

果樹生小青蟲將竹燈盼掛樹自無

元日日未出時以斧斑駁椎椎碎棗李等樹謂
之嫁樹

種石榴取直枝如大毋指斬一尺八九條共爲
一科燒二頭二寸作坑深一尺餘口徑一尺豎
枝坑畔周布令勻置枯骨薑石於枝間下土令
實一重骨石一重土出枝頭一寸水澆卽生又
以骨石置枝間則茂

杏熟時含肉納糞中至春旣生則移栽實地旣
移不得更移

移大海樹去其枝稍大其根盤沃以溝泥無不
活者

生龍眼沸湯內淖過食之不動脾

柿子尚生燉之即熟

凡果須候肉爛和核和之否則不類其種

柑橘橙等於枳棘上接者易活

林禽蛀以鐵線尋竅內鑽刺用百部末杪木釘

塞之如生毛蟲以魚腥水潑根或埋蠶蛾於地

下

菜

茄子開花時取葉布過路以灰圍之結子加倍

謂之嫁茄

種香菜常以洗魚水澆之則香而茂

種茄子時初見根處拍開搗硫黃一錢以泥培

之結子倍多其大如盞味甘而益人

菠稜過月朔乃生今月初二三日種與二十七

八日種者皆過來月初一乃生驗之信然蓋頗

稜國菜

生菜種之不必拘時纔盡即下種亦便出諺云

生菜不離園以不時而出也

香菜與土龍腦不得用糞澆澆則不香只以溝
泥水米泔水澆之佳

芟首根逐年移動生著不墨

枸杞可以插種

種枸杞法秋冬間收子於水盆中接取曝乾春
熟地作畦畦中去五寸土勾作壟壟中縛草梲
如臂長與畦等卽以泥塗草檄上以枸杞子布
於泥上以細土蓋令徧又以爛牛糞一重又以
土一重令畦平待苗出水澆之堪喫便剪

冬瓜正月晦日傍墻區種之區圓三寸深五寸
着糞種之

種韭畦欲深下水和糞初歲惟一剪每剪卽
加糞惟須深其畦爲容糞也

茄着五葉因雨移之

種蘿蔔宜沙糯地五月犁五六徧六月六日種
鋤不厭多稠卽少種

種芋根欲深斲其旁以復其土旱則澆之有草
鋤之

種茵子取爛楮木埋於地下常以米泔水澆之
令濕兩三日卽生


張約齊種花法云春分和氣盡接不得夏至陽
氣盛種不得立春正月中旬宜接櫻桃木犀排
徊黃薔薇正月下旬宜接桃梅李杏半丈紅蠟
梅梨棗栗柿楊柳紫薇二月上旬可接紫笑綿
橙匾橘已上種接並於十二月間沃以糞壤至
春時花果自然結實立秋後可接林禽川海棠
黃海棠寒球轉身紅祝家棠梨葉海棠南海棠
以上接種法並要接時將頭與木身皮對皮骨
對骨用麻皮緊纏上用箬葉寬覆之如萌茁稍
長卽徹去箬葉無有不成也

種樹書卷之下終

和
林
書

卷
之
下

十



菊譜上卷目錄

藝菊法

一培根

二分苗

三擇本

四摘頭

五搨眼

六剔蕊

七扞頭

八惜花

九護葉

十灌溉

十一去蟲

十二抑揚

十三拾遺

十四品第

藝菊法上卷目錄

十五名號

菊譜下卷

一之貯土

二之留土

三之分秧

四之登盆

五之理緝

六之護養

治菊月令

十二月分

目錄終

菊譜卷之上

嘉禾梅墟周履靖編次

藝菊法

一培根

凡菊於夏間澆灌得法秋後根頭便有嫩苗叢生俟花開過摘去枝葉止留本根尺許掘地作小窰澆糞一杓將菊本埋之摻軋土置窰中四向填摻新土仍愛護嫩苗比及到春已茂盛矣若不曾在盆原在地上者不必如此安排但只

於臘月中澆糞可也

二分苗

正月間擇地一所鋤轉拾去草根將糞澆一通越數日再鋤再澆又鋤擊碎土塊修治方整視平地而高阜尺許通溝道週圍以泄水至春分後清明前將所培根本掘起敲去泥土莖有些小細根雖無大根亦活於治地上相去七八寸栽一本每色隨意種多少餘者棄之便可用河水澆灌逐日侵晨如之直至莖葉鮮健方可用

河水對勻糞水十餘日澆一次

三擇本

穀雨後別選通風日無樹根草芽之地如前修治形欲高而溝欲深安排瓦盆在上無則用瓦四片箍成者亦妙以三分爲率留一分在上摻土將前所分苗本揀擇幹本盛大態度端莊者帶土掘起種盆內就於先所澆灌園泥培壅低盆口三寸庶可便於澆糞蓋菊所畏者水耳略被水淬則心瘁矣所用瓦者雨過水乾不致浸

漬兼上盆時去籬除瓦移入盆內又不傷根且不洩氣着花愈久此法甚妙若貧家無此栽根地上週圍積土培之如培土高亦可泄水無恙但澆糞不悉入於根耳既種之後每株相近根邊插紅油小竹一根入土欲深以不動搖爲度此竹乃菊之所倚藉以爲生者將本幹縛竹其歧枝用繩牽拽亦於竹上縛定其縛者棕櫚葉晒乾分細用之亦奈風日竹不油亦用得但油者可辟菊虎故用之

四摘頭

分苗之後高至七八寸便摘去頭令生歧枝其初起一枝頭之後必長三四枝其三四枝長尺許又摘去每枝又分長三四枝始以三枝言之第三次三三九枝欲要枝多再一摘無妨其枝繁雜未可刪去多存以防菊牛所傷直至白露後酌量根本肥瘦可留幾枝餘者去之有宜花多者有宜花少者不可一槩論如綉芙蓉海棠春之類則以花多爲入格大抵多者不過三

十花少者十數花足矣古法遇九則摘初九十
九二十九之類然亦不必拘拘于此

五插眼

每枝逐葉上近榦處生出小眼一一插去此眼
不插便生成附枝插眼之時切須輕手蓋菊葉
甚脆畧觸卽墮矣

六剔蕊

菊至結蕊時每枝頂心上留一蕊餘則剔去如
蕊細用針挑之其逐節間或比先插眼不盡至
不下矣

七扞頭

梅雨時取河泥搓成大彈丸樣將折下小附枝
三四寸者插入泥丸內插訖埋土中日逐用水
澆灌雖癩甚五七日則鮮活蓋根已生矣甚妙
用泥丸者氣不洩而易活易長也亦依前法摘
插或止用一花則不摘頭任其亂生枝柯臨時

悉皆刪去之止留一幹一花其花甚大而幹甚低也

八惜花

花雖傲霜其實畏之一爲風所凌便非向者標致風雨尤然何況於霜乎花蕊半開便可上盆移置軒窗通風日處每晨澆少水水不可多多則傷葉不若以小盞盛水放根邊用紙撚一條半縛根上半置水盞內水乾再添如此則根潤花滿而色正可得月餘賞翫否則於根所結縛

涼棚上用竹簾蘆箔之類亦可以爲菊花延壽齡也

九護葉

養花易養葉難凡根有枯葉不可摘去摘去則氣洩其葉自下而上逐旋黃矣澆糞時慎勿令糞着葉一着隨便黃落矣欲葉清茂時以韭汁澆根妙

十灌溉

梅天但遇大雨一歇便澆些少冷糞以扶助之

否則無故自瘁若厭於澆糞用糞泥于根邊周圍堆壅半升雨再至泥自濕其功勝糞甚遠大且不壞葉造糞泥法先于六月內將碎泥攤場上晒乾澆潑濃糞再晒再潑如此三四次敲十分碎簍篩過收盛缸內不可着雨至此取用間或用糞水一二次六七月內不可用糞用則枝葉皆蛀每晨用河水澆灌若有搗雞鷺毛水停積作冷清或浸蚕沙清水時常澆之尤妙最忌酒糟鹽滷直至立秋後逐旋用糞起初冷糞

一杓和水三杓越數日糞一杓水倍之又數日糞水停勻乃止結蓓蕾後純用冷糞一二次

十一去蠹

害菊之物有五曰菊牛曰蚱蜢曰青蟲曰黑蚰曰喜蛛是也蚱蜢青蟲食其葉黑蚰瘠其枝喜蛛侵其腦頭惟菊牛一名菊虎形似楊牛而小菊之大蠹也露未晞時停葉間此際可尋殺之但飛極快遲不可爲也五六月內遶皮咬啞產子在内變爲蟲則此一葉葉癩而垂凡折去之

時必須於損處更下一二寸庶免毒氣攻及一
樹以其損處劈開必有一小黑頭青蟲當撚殺
之蚱蜢青蟲皆當殺之如不欲害則拾取送他
處可也黑蚰古法用油紙撚燈吹滅以烟熏死
蚰死而枝傷不若用綿纏筋頭逐漸惹下手撚
殺之喜蛛則逐葉舒去其絲又蚯蚓亦能傷根
時用純糞潑之俟死卽用河水解其酷烈不常
用也至于蟻亦能傷菊一經蟻過則榦葉皆瘁
故種菊最宜潔淨不得以腥羶近之至如搗雞

鷺水亦不必澆之恐其引蟻故也其地更宜絕
其蟻種

十二抑揚

菊之本性有易高者醉西施之類是也有特低
者紫芍藥之類是也高者抑之低者揚之抑之
法頻摘頭比他本多一二次揚之法遲摘頭視
他本少一二次庶無過不及之差

十三拾遺

黃碧單葉二種生於山野籬落堤岸之間宜若

無足取者然譜中諸菊皆以香色態度爲人愛
好剪鋤移栽或至傷生而是花與之均賦一性
均受一氣同有此名而能避迹山野保其自然
有若士君子堅行操節隱處林壑不爲時世所
奪故亦無羨于諸菊也予嘉其大意而收之又
不敢雜置諸菊之中故特附錄于此

十四品第

或問菊奚先曰先色與香而後有態曰然則色
奚先曰黃黃者中之色易曰黃中通理詩曰綠

衣黃裳土旺季月而菊以九日花金土之應相
生而相得者也其次莫若白西方金氣之應菊
以秋開則于氣爲有鍾焉紫爲白變而紅又紫
之變也紫所以白之次而紅又紫之次云有色
矣而後有香有香矣而後有態是其爲花之尤
著也或又曰花以艷媚爲悅而子以態爲後歟
曰吾嘗聞諸古人矣妍卉凡花爲小人而松竹
蘭菊爲君子安有君子而以態爲悅歟至於具
香與色而又有態是君子而有威儀也又嘗聞

昔之譜菊者每稱勝爲最勝故在也擬之金鶴翎非其所彷彿豈其無祖於古而屈隆于今耶或見愛之者衆而逞詭獻奇耶皆不可曉也班志有曰小說家流千三百八十三篇蓋出於禪官道塗之說也矧其事者必先利其器尋其波者必計其源吾嘗觀茶經竹譜尚言始末成一家之說况菊之所受又有不同焉老圃云菊有千種惟花碩豐麗千葉無心爲上予之并見十之二三或因人所好名器不同實一色耳子曰

雖小道必有可觀者焉苟致遠而不泥庶幾近道矣

十五名號

金鶴翎

深黃色千葉

銀鶴翎

白色千葉

蜜鶴翎

蜜色千葉

紫鶴翎

淡紫色千葉

紅鶴翎

深紅色千葉

金芍藥

深黃色千葉

銀芍藥

白色千葉

金寶相

深黃色千葉

銀寶相

白色千葉

金西施

嫩黃色千葉

白西施

純白色千葉

病西施

萎黃色千葉

蜜西施 淡黄色千葉

錦西施 紅黄色千葉

蠟瓣西施 黃蠟色千葉

蜜褐西施 重蜜褐色千葉

玉板西施 粉紅色千葉

銀紅西施 銀紅色千葉

二色西施 淡黃純白色千葉

陰陽西施 每花中分黃白色千葉

韃蠻西施 白色千葉

瑪瑙西施 紅白色千葉

黃牡丹 嫩黄色千葉

蜜牡丹 蜜色千葉

白牡丹 白色千葉

錦牡丹 紅黄色千葉

紫牡丹 艷紫色千葉

粉牡丹 粉紅色千葉

紅牡丹 大紅千葉

二色牡丹 大紅艷紫二色千葉

紫剪絨 深紫千葉葉茸如剪

剪蘇桃 彷彿紫剪絨韻度似不侔矣

墨蘇桃 紫黑色千葉

紅蘇桃 重紅千葉葉茸如剪

白粉毬 淡粉色千葉

二色粉毬 粉紅淡紫二色千葉

紫粉毬 紫色千葉

粉萬管 粉紅千葉葉如管

射香毬 紅黄色千葉

紅綉毬 大紅千葉如毬

粉姐已 粉紅色千葉

紫姐已 紫花千葉

雀舌牡丹 花同雀舌葉似牡丹千葉

紫霞觴 紫色千葉

黃鶴頂 深黄色千葉

白鶴頂 白色千葉

檀香鶴頂 淡黄色千葉

瑪瑙鶴頂 紅黄色千葉

鶴頂紅 粉紅千葉中心 紅心鶴頂 粉紅色千葉

粉紅鶴頂 粉紅色千葉 金絲鶴頂 粉紅色千葉中有黃紋

瑪瑙盤 紅黃色千葉 瑪瑙紅 淡紅色千葉

瑪瑙黃 紅黃色千葉 二色瑪瑙 粉紅淡黃二色千葉

粉玉盤 紅粉千葉 瑤臺雪 千葉大白花

萬卷樓 粉紅千葉葉加 一捧雪 千葉大白花

賽瓊花 粉紅色千葉 玉齒齶 粉紅色千葉

葵菊 粉紅色千葉 二色齒齶 粉紅淡黃二色千葉

出爐銀 銀紅色千葉 水紅蓮 粉紅色千葉

二色芙蓉 重粉淡黃二色千葉 齒齶紅 粉紅色千葉

白佛見笑 白色千葉 嘉興秋牡丹 粉紅色千葉

吳江秋牡丹 粉紅色千葉 常熟秋牡丹 粉紅色千葉

白蠻毬 白色千葉如毬 粉蠻毬 粉紅千葉如毬

大楊妃 粉紅色千葉 二色楊妃 重粉紅黃二色千葉

退姿白 初開微紅後漸白色千葉 浦花 粉紅色千葉花朵極大

紅玉蓮 重粉千葉 錦瑞香毬 紅黃色千葉

金瑞香毬 深黃色千葉 紫瑞香毬 紫色千葉

散瓣瑞香 紫色千葉 八寶瑞香毬 粉紅色千葉

菊香 卷三

紅瑞香毬

深紅色千葉

白瑞香毬

白色千葉

西番蓮

白細色千葉

紅楊妃

淡紅色千葉

紫楊妃

紫色千葉

金褒姒

金黃色千葉

白褒姒

白色千葉

紫褒姒

紫色千葉

粉褒姒

粉紅色千葉

紫撓頭

粉紅色千葉

呂公袍

淡葱白色千葉

班鳩翎

紫蒼色如班鳩

玉蓮環

白色千葉花開
葉皆圓卷

瑣圍

大紅千葉葉邊周
圍有黃色

闊板大紅毬

大紅千葉
反葉成毬

細葉小紅毬

大紅千葉
如毬

大紅獅子毬

大紅千葉每花有二三青莖突起

黃四面

重黃千葉

錦四面

紅黃千葉

白四面

白色千葉

紫四面

深紫色千葉

樓子紅

大紅千葉黃心
中又起數瓣

紫袍金帶

紫紅色千葉
中有細黃心

酒金紅

深紅千葉葉開
有黃點如酒

蜜萼

蜜色千葉

導金蓮

深黃色千葉

通州紅

嬌紅千葉

紫雙飛

紫色千葉每花
有二心

蜜探

蜜色千葉

金芙蓉

深黃千葉

錦芙蓉

紅黃千葉

紫芙蓉

淡色千葉

玉芙蓉

粉紅千葉

紅芙蓉

淡紅千葉

黃茶蘼

蜜色千葉

白茶藤 白色千葉

黃芍藥 重黃千葉

蜜芍藥 蜜色千葉

白芍藥 白色千葉

紫芍藥 淡紫千葉

金雀舌 重黃千葉葉尖如雀之舌

白雀舌 玉色千葉

錦雀舌 紅黃色千葉

粉雀舌 粉紅千葉

紫雀舌 淡紫色千葉

蜜雀舌 蜜色千葉

相袍紅 深紅色千葉

銀硃紅 嬌紅千葉

倚欄嬌 淡紫千葉花頭倒側如倚

赭袍黃 深黃千葉

勝荷紅 粉紅千葉花如荷瓣

采石黃 淡黃千葉

紫薔薇 淡紫色千葉小花

黃眉 嫩黃千葉

福州 艷紫千葉

鄧州白 千葉大白花

鄧州黃 淡黃千葉

蜜疊雪 蜜色千葉

白疊雪 白千葉

蓮肉紅 肉紅千葉

紅蛾嬌 紅色千葉

玉蛾嬌 粉紅千葉

粉蓮 粉紅千葉

海棠春 嬌紅千葉

佛座蓮 粉紅千葉

黃樓子 淡黃千葉葉起如樓子

茄菊 淡紫千葉

紫袍金甲 深紫單葉中心細管上作黃色

檀香毬 重蜜色千葉

白羅毬 白千葉如毬

蠟鎖口 花似金瑣口黃 金瑣口 大紅多葉葉週

黃木樨毬 蜜色千葉如 白木樨毬 白千葉

白羅傘 白千葉葉下垂 羅山錦 紅黃千葉反葉

羅山紫 重紫千葉成毬 紫綬金章 紅黃千葉

紫間金 深黃重紫二色 勝緋桃 深紅千葉小花

萬管紅 深紅千葉葉如 剪金紅 深紅千葉

紅剪絨 淡紅千葉葉細 黃玉樓春 淡黃千葉

白玉樓春 白千葉 並頭紅 重紅千葉

二色並 金約重紅二色 通州黃 重黃千葉

金蓮寶相 紅黃千葉 紅蓮寶相 嬌紅千葉

大金毬 深黃千葉如毬 御袍黃 重黃千葉

玉指甲 粉紅千葉 金剪絨 深黃葉葉茸如

蜜彩毬 蜜色千葉 水晶毬 初開微青後白

雞冠紫 深紫千葉 象牙毬 初開微紅後蒼

銀紅雞冠 淡紅千葉 雞冠紅 深紅千葉

狀元紫 深紫千葉 金鳳毛 深黃千葉

銀紐絲 白色千葉 龍鬚黃 嫩黃千葉

鶯羽黃 嬌黃千葉 剪金黃 淡黃千葉如剪

勝紫衫 深紫千葉

傲霜黃 嫩黃千葉

荔枝丹 紅黃千葉

報君知 深黃千葉開干九日前

白雪團 白千葉小花

黃丁香 深黃千葉小花又名滿天星

黃萬管 嫩黃千葉葉如管

赤丁香 紅黃千葉

紫玉蓮 粉紅千葉小花

錦八寶 紅黃千葉

僧衣紅 淡黃紅千葉

錦玲瓏 紅黃千葉小花

五色梅 單葉小花花具五色

黃都勝 紅黃千葉花朵豐大

五月白 白花千葉一歲中開五月九月二度

狀元黃 深黃千葉 金紐絲 重黃千葉

賓州紅 淡紅千葉

粉剪毬 粉紅千葉葉茸如剪

茶菊 淡黃千葉

紫剪毬 淡紫千葉如粉色者

黃玉蓮 嫩黃多葉小花

相袍黃 淡黃多葉

錦荔枝 紅黃多葉中有黃心

金盞銀臺 四邊白色中心正黃千葉

甘菊 深黃多葉花極小

小金眼 深紅多葉中有黃心

大金錢 深黃多葉小花

銀茉莉 單葉小白花

冬菊 深黃多葉開以十月

白冬菊 多葉小白花

黃蠻裘 嬌黃千葉

菊譜上卷終

菊譜卷之下

吳郡五嶽山人黃省曾著

嘉禾梅墟道人周履靖校

一之貯土

凡藝菊擇肥地一方冬至之後以純糞滾之候凍而軋取其土之浮鬆者置之場地之上再糞之收水之後乃收之於室中春分之後出而曬之日數次翻之去其蛭蟻及其草梗草梗不去則蒸而腐焉是生紅蟲生土蠶生蚯蚓為菊之

害土淨矣乃善藏之以待登盆之需登盆也俱用此土又以待加盆之需菊之登于盆也或遭三日以上之雨土實而根露則以土加而覆之一則蔽日之曝不枯其根一則收雨之澤不爛其根

二之留種

冬初而菊殘也一衰卽并英葉而去其上莖其幹留五六寸焉或附於盆或出於盆埋之圃之陽鬆土之內臘之月必濃糞澆之以數次菊之

性而耐於寒故土糞多則煖而不
可以壯菊本可以禦隆寒可以潤澤而不至於枯燥

三之分秧

春分之後是分菊秧根多鬚而土中之莖黃白色者謂之老鬚少而純白者謂之嫩老可分嫩不可分分之分於新鋤之鬆地不宜太肥肥則籠菊頭而不能長發天之陰可分有日分之則枯乾而難活種之其宿土也盡去否則恐有蟲子之害既秧於土矣以越席架而覆之毋令經日

經日則難醒每日晨灌之晚灌之天之陰不可傷於水秧心發芽矣可去其覆席先用半糞之水復用肥水灌之葉上不可以沾糞沾之則葉枯用河之水則純河之水用井之水則純井之水不可雜焉

四之登盆

立夏之候菊苗成矣可五六寸許是爲上盆之期將上盆也數日不可以澆灌使苗受勞而堅老則在盆可以耐日其起秧苗也掘根之土必

廣而大少則露根而傷其本用臘前所滾之土壅之其灌也視陰晴而爲增損使土壯而入根服盆而生葉則用肥水灌之久雨加臘土以澆之其種也根深則不耐水淺不耐日隨土而稍深何也菊之根其生也向上故常覆土爲加

五之理緝

菊之尺許矣是宜理緝欲長也則去其旁枝欲短也則去其正枝花之朶視其種之大小而存之犬者四五朶焉次者七八朶焉又次十餘朶

焉小者二十餘葉焉惟甘菊寒菊獨梗而有千
花不可去也

六之護養

菊稍長也竹而縛之母令風之得搖雨之久也
宜出水盆內亦然菊傷之蟻多也則以鼈甲置
於傍蟻必集焉移之遠所夏至之前後有蟲焉
黑色而硬殼其名曰菊虎晴暖而飛出不出於
已午未之三時宜候而除之菊之爲菊虎所傷
也傷之處仍手微摘之磨去其牙蟲毒可以免

秋後之生蟲如虎之多也必多栽易壯盛之菊
於圃之周菊有香焉蟻上而糞之則生蟲蟲長
而蟻又食之則菊籠頭而不長其蟲之狀如白
虱以棕線作帚而刷之扇以承之揮之於遠所
秋後而不見蟲也宜認糞跡是有象榦之蟲其
色與榦無殊也生於葉底上半月在於葉根之
上榦下半月在於葉根之下榦或破榦取之以
紙撚縛之常以水而潤其紙條花乃無恙或用
鐵線磨爲邪鋒之小刃上半月於蛙眼向上而

搜蟲下半年月在蛙眼向下而搜蟲有菊牛馬沿之則萋種臺慈則可以辟麻雀雀愛取菊之葉而爲巢取之則萋四之月雀乃爲巢時宜慎也

治菊月令

正月

立春數日將隔年酵過肥鬆淨土用濃糞再酵二三次令深二尺以伺分種之需若舊種在盆或舊地切不可移動仍用草溫護老本斯秧發早而壯大

二月

二月初旬冰雪消泮此時除去舊護穰草春分後仍將前酵之地倒鬆再用大糞酵之擇新長可分菊秧逐莖分開相去六七寸蒔一根每早汲河水澆活以待再種但奇異者必發苗少務在培植一法用朽木一塊每月凡遇修理之際取修下頭梗將木鑽孔用梗遷入孔中木上薄加肥土木下透梗少許漂浮水缺中待其根生搬種地上緝理長成庶不斷種

三月

谷雨前數日擇前秧長壯正直者搬種築酵熟所植之地比平地高尺許相去尺餘掘穴一枚每穴加糞一杓塘掇法方可搬秧植之四圍餘土鋤爬壅根高如饅頭樣令易瀉水周圍必留深溝洩水但雨過不拘何月務將積溝之水疏通流別處不分在地在盆卽以酵熟軋土壅根如久雨盆植者可移置簷下或用篾籬瓦作盆埋地令一半入土內一半露土上使地氣相

接水不停積先將肥土倒鬆填二三分于盆加濃糞一杓後搬菊秧植之再將前土填滿亦壅如饅頭樣又一法將肥鬆之土用細篩篩靜入甑用水燒蒸二三沸取起倒出晒軋入盆植菊能殺虫無侵蝕之患其秧搬時每株根邊必帶故土周方二寸使其不知遷動或用樹葉或碎瓦蓋其根土以防雨濺泥污青葉若失蓋俟雨歇移水至菊旁將菊葉洗去泥滓此法尤妙各月如之能遵此法則菊自頂至根青葉暢茂不

至枯槁每遇澆灌瓦蓋者可除去澆過仍蓋之
新種後必間日早用河水和糞澆之又用搭棚
遮蔽日色以度其生遇雨露揭去但日晴燥不
蓋之自始至秋皆依前法

四月

小滿前後菊嫩頭上多生小蜘蛛每早起尋殺
之又生一種曰菊牛日未出時慣咬菊頭其頭
日盛卽垂視其咬處懸寸許必搯去無害遲則
中生蛀虫雖至秋結蓋若遇大風雨必折菊牛

其狀如蠅背甲堅而黑亦須尋殺之又有一等
細蟻侵蛀菊本用洗過鮮魚水洒于葉間或澆
土上則除如不斷仍須早起尋殺爲良菊長尺
四五寸每株用堅直小籬竹近插菊根以軟莎
草寬縛使菊本正直不至屈曲數日視菊大
小可搯去母頭令其分長子頭擇高大者先去
瘦短者隔幾日去之每本止留四五頭多至六
七頭以防損折如理寒菊必須頭多用箴作籬
圍定則秋深團圍如蓋可愛若用過接必在此

時用菴藜草或雜菊摘去嫩頭擇奇菊亦摘頭
將二頭以刀斜批視相合卽用鷺毛管或薄蘆
管管在所接之處莫令寬動外用泥密閉管口
兩頭或紙條縛定置于陰處數日視有生意輕
輕用刀撿去其管每一本接得四五色又一法
曰過枝預於種植之際將菊如水車二柱并周
圍簷柱樣種之至此月除脊菊中間正枝不動
將脊菊東南枝交過簷菊亦將東南簷菊順枝
扯來交過將二枝刀撿膚肉各去半邊用綿紙
條緊纏引水常潤仍用搭棚蔽日遇雨露除之
視兩枝交合生意已成然後將脊菊之頭簷菊
之梗相連處用刀撿斷遂成一本惟梅雨中可
活餘必無生意

五月

五月夏至前用濃糞七分河水三分澆之夏至
後照前法再去頭止留五六枝爲正若枝繁者
多留一二以防損折每早澆灌止用掃雞鷺毛
湯并縲絲湯盛缸中作腐者取其清水或洗鮮

魚或菜餅屑水取其清冷者灌之不可犯酒醋
并鹽物觸之菊最畏梅雨此月尤宜顧盼

六月

六月大暑中每早止用清河水澆隔三四日以
鷺毛冷湯輪灌若土間生蚯蚓土蚕等看去根
遠近掘出殺之近根難滅者用糞灌之必欲促
死蟲斷仍用河水連澆數日大抵此月天熱土
燥不可用糞糞多則頭籠青葉皆消泛如蠟板
水晶盆金銀鶴翎芍藥之類尤不宜多用餘菊

不妨

七月

七月初旬有等蚕樣青虫與葉一色善食葉亦
用早起尋殺之若被傷枝葉難爲觀賞立秋之
後三五日不論其枝長短並不可損但枝有參
差者將長枝以大針戮眼拔去針即將細篾絲
一段插入眼內拴住待短者長齊然後取去篾
絲使並長也菊之全本亦有參差高大者不用
糞澆瘦短者用水和糞澆之促長以成行列用

糞之法各有次序第一次糞二分河水八分越
半旬第二次糞三分河水七分再越半旬第三
次用糞五分河水五分又越半旬第四次糞七
河水三分第五次全用糞瘦者多澆茂者少用
若太過必使蕊頭籠閉青葉愈盛開花反小

八月

八月間多有狂風驟雨每本再揀堅直籬竹綁
定用莎草從根緊縛二三節勿令搖動傷殘白
露後發生蓓雷蕊頭將綻大枝上擇大蕊留一

枚餘皆刪去弗可多留冬則開花微薄菊蕊嫩
脆選時必須以左手雙指穩梗然後以右手指
甲掐蕊否則連頭剔落遂爲無用既結蕊隔二
三日常用濃糞澆灌則花大色艷甚至變有二
色者

九月

九月蕊綻將開之際必預搭陰廠遮蔽風霜庶
花開悠久色不衰褪如小開亦不可將本移動
漏洩真氣花開間有不足者磨硫黃水澆

夜卽發屢試已驗遇有異色而自已無者但
覓得不可直種將來橫種地上認記根頭用肥
土壓枝經月視根生以刀斷梗則根枝兩生種
可多得其原本再加肥土薄薄壅之不可過多
多則根深難發矣

十月

十月上旬菊花已殘將綁縛朽竹撤去好者貯
備來年之用本上枯花小枝並折去止留老幹
尺許勿使折遲以被風搖本根傷殘苗裔此時
悉用亂穰草蓋護以禦霜雪冰凍每本置竹牌
一片寫號掛之或寫竹牌插根旁記之來春分
種庶不淆亂也

十一月

十一月中旬未凍之時擇高阜淨地倒鬆深二
尺許揀去瓦礫木石用糞三四次醃肥綠菊最
喜新土怕宿土必須一年一換盆中亦然否則
春間雖活經梅雨必死醃完用舊藁薦或亂穰
草蓋地免致冰凍難鋤減糞肥力有誤來年

植之用

十二月

十二月初旬看菊本蓋少處再加厚護以蔽霜
雪及天日和暖用糞糖搗菊本四邊莫令着根
春氣發揚苗則群然盛長矣一法臘月內掘地
埋缸積濃糞上蓋板填土密錮至春查滓俱化
土存清水名爲金糞五六月間菊爲雨採黃萎
用此糞澆之足以回生且開花肥澤甚妙

菊譜下卷終

